

3 Yohana Yohana ya sεmε taanri wo wemu ka ge

Jɔɔ mu we sεmε we d'a tun wε?

N'a daa fɔɔ wa mu Yohana ya we sεmε taanri wo we tun. Wee mεge ki bye Gayusi.

We sεmε we kakana ɲuɲɔ

Yohana ya li she Gayusi na na wee ya Kile Kafila wu yeε pyeεε piimu torogo wu mu ge, na w'a pu coni xuuni. Na wu ganha bu daha Jotεrfu wo ɲaha sheshεεε te feni wε. Wee Jotεrfu we bye egilizi ɲahagbaa fɔɔ, ga Yohana bi Kile Jozaama pu joveε piimu torogo wu mu ge, wu bi gbara w'a pee tirige wε.

A w'i wu fiin jo na waha sεmε wu ni na kan Demecusi mu. Wee p'a wii na wee w'a pa ni sεmε wu ni.

Sεmε wu kafila ɲugbɔɔ

3 Yohana 1-4 Yohana fɔ mujuu.

3 Yohana 5-8 Gayusi wo ɲaarigazaana le.

3 Yohana 9-12 Na Gayusi ganha bu daha Jotεrfu wo torogana li feni wε.

3 Yohana 13-15 Jomɔ pu taxɔɔ.

Yohana fɔ mujuu

¹ Nε wemu wu ɲε egilizi nɔhɔle ge, nε wa we sεmε we ka na tun na taanrii Gayusi mu, wee wemu kaa l'a dan nε ni can ye pyaa na ge.

² Na taanɲii, nε Kile ɲεeri mu mu, kɔnhɔ ma keree di da ɲaha taa tuun bεeri ni, m'a bye sicuumɔ na, ba Kile ya ma zɔ wu pye fεεfεε wε. ³ Cebooloo n'a daa fεε pii ya nɔ wɛe yiri naha. Ba can wu wa mu zɔ wu na wε, ni ba mu ya ɲaari na sahanɲi ni can wu ni wε, p'a yee paari wɛe mu. Yee ya taan nε ni xuuni. ⁴ Bani nε bu logo na nε nagoo p'a can wu koro ɲaari, yafiin ya dan nε ni na lee xɔ wε.

Gayusi wo ɲaarigazaana le

⁵ Na taanɲii, lemu bεeri m'a byi wù cebooloo n'a daa fεε pu mu, ali na ta p'i ɲε bε nabuun ge, lee bεeri ya ɲɔ xuuni. M'a li pyi ni ɲɔmεε fεεε ni Kile mu. ⁶ M'a pu co ni taanɲεεge kemu ni ge, p'a pa kee kaa jo n'a daa fεε pu mu naha. Ayiwa, ɲɔ mayε na, ɲara lemu p'a giin di bye sanha ge, m'a pu tεge na bε ni Kile ɲidaan ni. ⁷ Bani Yesu Kirisa wo labye wu wuu na p'a lee ɲara li pyi. Wa bεeri wu ɲε wu ya dà Yesu Kirisa na-ε ge, pu wa wee wa shishiin bε keɲε yaaga feni wε. ⁸ Lee wuu na wɛe n'a daa fεε ya yaa na pii sipyii pii shi tɛri. Wù ba lee pyi, l'a bye ma na giin wɛe bε p'a fara pu na pu labye wu funɲɔ ni, na can koo li shεε sipyii pu na.

Jotεrfu mεge ya kyεegi

⁹ Ayiwa, nε ɲɔɲii kii ka sεmε wεnε la na na tun n'a daa fεε pu mu wà. Ga we wu ɲε Jotεrfu ge, wu ya se wɛe kabeshεε na wε, na giin wu wuyε pye n'a daa fεε pu ɲahagbaa fɔɔ wa. ¹⁰ Lee wuu na nε ba nɔ wà, kaparaya yemu bεeri w'a byi ge, na joguuumɔ pemu bεeri yu na waa wɛe na, na kafinεyε yemu bεeri tɛri wɛe na ge, n'a da yee bεeri jo yi ɲii na. Wu yεε ya ta da kii yε na-ε dε, wu ya ta sɔɔ cebooloo n'a daa

fɛɛ p'a diri wu mu wɛ. N'a daa fɔɔ wa bɛ bu jo wu pee tirige wuyɛ y'iri, w'a jo tapyege wa lee bɛ na wɛ, na weefɔɔ kɔri yeege n'a daa fɛɛ pu pinnɛgɛ ki ni.

¹¹ Ayiwa, na taanɲii Gayusi, ma ganha bu da bye ye kakuuyo ye tuugo taannivɔɔ wɛ dɛ, ga ta kasaanɲaa taanni. Sipyɛ wemu w'a saama pyi ge, wee wu ɲɛ Kilɛ wo. Ga wemu bu gori yaha kakuuyo na na byi, lee ya li shɛɛ na weefɔɔ ya Kilɛ cɛ wɛ.

Demecusi ya masɔɲɔ ta

¹² Ayiwa Demecusi kunni, n'a daa fɛɛ pu bɛɛri ya wee mɛsaɲa yu. Can koo lemu bɛ w'a ɲaari ge, lee bɛ di wu mɛsaɲa yu. Wee bɛ wa li fiin na can wu ɲɛ wii.

Jomɔ pu taxɔgɔ

¹³ Ayiwa, jomɔ niɲɛhɛmɛ wa nɛ mu na yu ma mu, ga na funɲɔ wa di pee bɛɛri ka sɛmɛ we ni wɛ. ¹⁴ Nɛ giin jo l'a da mɔ wɛɛ di wùye ɲa, wù jo wùye ɲii na wɛ. ¹⁵ Kilɛ wu ɲaɲiɲɛ kan ma mu! Ma ɲaɲiinɛɛ piimu pu wa naha ge, pee ya ma fò waa. Ma bɛ wu wù fò kan wù ɲaɲiinɛɛ pu bɛɛri nigin nigin mu wà.

KARINĒĒGE NŌMĒE NIVONŌ
New Testament and Shorter Old Testament in
Senoufo, Mamara

copyright © 2014 Wycliffe Bible Translators, Inc.

Language: Mamara S noufo (S noufo, Mamara)

Translation by: Wycliffe Bible Translators

Contributor: Wycliffe Bible Translators, Inc.

  2014-08-10, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 21 Feb 2024 from source files dated 29 Jan 2022

85728ed7-78f8-58e8-8967-0e976c0c2423